



UKA 2017/115  
10. oktober 2017  
Debora Kleist

**Illoqarfinni nunat immikkoortuini qitiusumik napparsimaveqarfiusuni toqusimasut timaannik ikuallaaveqalersinnaaneraniq periarfissanik kiisalu aningaasaqarnikkut pitsaaqutinik pitsaannequtinillu misissuinisamik Naalakkersuisut peqquneqarnissat pillugu Inatsisartuni aallajangiiffigisassatut siunnersuut. Taamattaaq Naalakkersuisunit misissuiffigineqassaaq innuutaasut toqusimasut timaannik ikuallaasalersinnaanermut periarfissaqalernissaq tapersersorneqarnerisooq. Misissuinerup inerneru UKA18 aallartitsinnagu saqqummiunneqassaaq.**

(Inatsisartuni ilaasortaq Kelly Berthelsen, Inuit Ataqatigiit)

Aallarniutigalugu Inatsisartuni ilaasortaq Kelly Berthelsen, Inuit Ataqatigiit qutsavigissavarput illoqarfinni nunap immikkoortuini qitiusumik napparsimaveqarfiusuni toqussimasup timaannik ikuallaaveqalersinnaaneraniq periarfissaqalersinnaaneraniq pillugu siunnersuuteqarmat. Tassungalu atatillugu aningaasatigut pitsaaqutit pitsaannequtinillu misissuiffigineqaaqqullugit. Kiisalu innuutaasut toqusimasut timaanik ikuallaasalersinnaanermut periarfissaqalernissap tapersersorneqarneranut Naalakkersuisut aamma misissuiffigisagaat, misissuinerullu inerneru 2018 upernaakkut Inatsisartut ataatsimiinneranni Naalakkersuisut saqqummiutissagaat.

Inatsisartuni ilaasortap Kelly Berthelsenip siunnersuuteqarnermigut aammattaaq anguniarpaa, ilaqutariit qimagaasut toqusup timaanik assartuinissamut akisussaasuusartut. Toqusimasullu timaanik assartuineq ilaqutariit ilaannut aningaasatigut annertuumik annikilliornerup nalaanni nammakkiisinnaasarnera, paasilluarparput isumaqatigaarput.

Inuit Ataqatigiinnit isumaqarpugut, Nunatsinni toqusunik ikuallaaviliortoqarsinnaaneranut siunnersuummut peqqissaartumik nalilersuiffiginissaa pisariaqassasoq. Minnerunngitsumillu inuttaasunik akornanni oqallisigilluarneqarnissaa pingaaruteqarluinnartutut isigaarput.

Taasumalu peqatigisaanik susassaqtut allat immersueqataalluarnissaat kaammattuutigerusupparput, kiisalu nunatsinni peqatigiiffik Illerfissarsiu-

tileqatigiit ilaasortamik toqukkut qimagunnerini ilaqutaasunut artukkiinnginnissaq siunertaralugu suliniuteqartuarnerat, Inuit Ataqtigiinniit nersortariaqartutut isumaqarfigaarput.

Taamaattumik siunnersuuteqartoq nunatsinni toqusimasut timaannik ikuallaaveqalersinnaaneranik periarfissanik misissuinissaanik siunnersuuteqarnera taperserparput.

Naalackersuisut akissuteqaateqarneranni atuarneqarsinnaavoq misissuiso-qarnissaa pingaartikkaat aammalu inuttaasut akornanni qanoq isummersorfigineqarlunilu tapersersorneqartigineranut suliniuteqarnissamut peqataarusussuseqarnerat.

Aammattaaq Naalackersuisut akissuteqaatiminni allannguutissatut siunnersuummik saqqummiussipput, inuttaasut toqusimasup timaannik ikuallaasalersinnaanermut periarfissaqalernissaanut tapersersorneqarnersoq misissuiffiginiarlugu, tamannalu 2018 ukiakkut saqqummiunnissaa siunnerfigalu.

Taamaattumik taama oqaaseqarluta Naalackersuisut allannguutissatut siunnersuutaat taperserlugu ataatsimiititaliami susasaqartumi peqqissaarullugu suliarineqarnissaa innersuussutigaarput.